

Mud Volapüka

Nüm 57

19 mayul 2017

Bukemaboed

Fövot lekoned-mära yutopik
„Ventürs hiel ‚Nenolikan‘ e flenas omik“
fa hiel „N. N. Nosov“

Kapit velid. Blümükam ad täv.

Pö göd balidfovik Nolikan egalükom flenis okik gölikumo. Valikans efigalikons ed eprimons ad blümikön ad detäv. Skrubül e Lebuonül efilenükoms yäkis küirik oksik. Yagan: Glöbül< efilenükom bu-butis [butis löfilik] küirik okik. Dils löpik butas at ästadons löpikumomo ka kiens ed päfaisnabons me snabs löpo. Buts at äbinons vemo pötiku pro täv. Spidülan efilenükom klotemi: ‚leklär‘< okik. Gun at digädon ad konön uti pato. Spidülan, kel ai äspidom ed no äplidom ad lufegebön timi, idatikom guni patik pro ok, kel älabon knopi nonik. Sevädos, das tim mödikün pakonsumon pö klotam e säklotam ad fäiknopön e säknopön knopis. Pö gun Spidülana jit e blit soelöfiks no ädabinons: uts äkobotons ad lölot balätik modü yümäta-klotem. Yümätaklotem at päfäiknopon löpo me knop bal, kel päpladon pö koapa-bäk. Ven äfisäknopoy knopi at, tän klotem lölik me mod seimik nedaseivovik äfidofalon mu vifiko se jots äl futs.

Bastetül bigik äfilenükom guni gudikün okik. Bastetül ädigidom pokis kol klotem bulöfo. Plü poks äkomons, plü utan äküipom klotemi gudikumi. Klotem gudikün omik



äbinädon me poks degvel. Yäk äbinädon me poks deg: poks tel pö blöt, poks lästenik tel pö bälid, poks tel pö flans, poks kil pö nin e ut klänik bal pö bäk. Blits älabons: pokis tel föfo, pokis tel pödo, pokis tel pö flans e poki bal dono len kien. Pö aldelalif kanoy logon klotemis degvela-pokik somik ko pok len kien te pö [bevü] kämitölatans.

Sirupül efilenükom klotemi ko deka-magod kvadik. Ai älenükom klotemis kvadöfik. Blit, gun e luhät omiks äbinons kvadöfikus. Eküpölo omi fagao, lövikans ai äsagons: „Logedolsös, logedolsös, ekö!, cögaboed golon“. Baülan efilenükom skiyama-klotemi, keli ädütedom as vemo kovenik ad täv. Boülan efilenükom nabayäki ko dekamagod tanedik, stogis tanedöfik, ed eflabülom särviggi me särvigastofäd tanedöfik. Älogotom tanedöfik pö klotem at, ed äjinos fagao, das atos binon leno Boülan ab matrad tanedöfik komunik. Valemo, valikans efiklotoms oki distöfiko, te Perönülan, kel älabom kösömi ad jedön yegis okik seimio, ga no äkanom fituvön yäki okik. Id isteigom [ipladom] luhäti okik seimio, e do ätuvom uti lunüpo no äkanom fituvön oni valöpo. Fino efituvom dis bed häti nifüpik okik ko lila-kläps.

Pänan: Kölamarüd< esludom, das opänom valikosi, keli ologom pö täv. Esumom kölamastöfis e köfi okiks ed ibüo-pladom onis ini bäset flitanafa. Lür esludom ad sumön [kepolön] fluti ko ok. Sanan: Pilulülan< esumom tröka-pöteki e koo epladom oni ini bäset disi bamil. Atos äbinon vemo büökäliku, bi pö täv seiman äkanom malädikön.

Nog düp mälid no äkömon gödo, ab ti zif lölik ya ekobikon züo. Lövikans mödik, kels ävipons ad küpedön fliti, äseadons su kiuds, su bakuns, su doma-nufs.

Spidülan bu valikans exänom ini bäset ed evälo seadöpi kovenikün pro ok. Pos etan Nenolikan äxänom.

„Lülogolsös,“ - lülogans ikobiköls züo ävokädons - „ya utans axänons!“

„Lü kis efixänols ini bäset?“ - Nolikan esagom. - „Dekömolsöd, nog tusuniko.“



„Kikodi suniko? Ya mögos ad flitön“ - Nenolikan egesagom.

„Kisi suemol! Būo nedos ad fulükön bäluni me lut vamik.“

„Ab kikodo me lut vamik?“ - Spidūlan esäkom.

„Bi lut vamik binon leitikumu ka ot koldik ed ai löpikon. Ven ufulükobs bäluni me lut vamik, ut ulöpiorlöädön ed otiron bäluni löpio“ - Nolikan efiplänom.

„Ö!, kludo lut vamik zesüdön zuo!“ - Nenolikan esagom lunaduliko, e kobü Spidūlan efidekömom dese bäset.

„Lülogolsös,“ - seiman pö nuf doma nilädik ävokädön - „utans asekömons ge! Erefudons ad flitön.“

„Fe eklemedons“ - äsäkoys de nuf votik. - „Üfo vo-li mögos ad flitön pö bälun somik! Te cütöns publügi.“

Dü tim ot Nolikan ebüedom fulükön sakis anik me sab e pladön onis ini bäset fa lövikans. Sunädo Spidūlan, Seilan, Baūlan e hicilils votik eprimoms ad besteigädön sakis me sab e pladön onis ini bäset.

„Kisi etans dunoms-li?“ - lülogans asäkons odis ön bluv. - „Pladoms sakis ko sab ini bäset demü kod nesevädik.“

„He!, lü kis neodols sakis ko sab?“ - Löpikan ävokädön, kel äseadom su kiud.

„Ven ufilöpikobs, tän ojedobs onis löpao sui kaps olik“ - Nenolikan egesagom.

Dido Nenolikan leno äsueмом kikodo saks zesüdons. Emagälom atosi jenöfo.

„Löplikolsös büiküno!“ - Löpikan ävokädön.

Hicilil: ‚Luskopül’an‘, äseadöl su kiud nilü Löpikan, esagom:

„Ba, dredons ad flitön e vilons, das saks ko sab oflitons pla atans.“

Äsmilöys züo:

„Fe dredons! Ab kisi utans bedredons? Fe ga bälun no ofliron.“

„Ab, bo, ut ofliron-la“ - bal jicililas esagof, kels koo älogedofs



da maifodils kiuda.

Du feitoys züo, Nolikan ebüdom ad davedükön fili zänodü yad, e valikans äloegons blinön se voböp okik e pladön sui fil stemacafi gretik kuprinik fa Skrubül e Lebuonül. Atans [Skrubül e Lebuonül] imekoms cafi at ya bü lunüp ad vamükön luti. Caf älabon tegoti härmetik ko hog. Pömöm pilenyümon flano ad nüpömön luti ini caf. Lut at pävamükön ninü caf ed äplödikon ya vamiku da hog löpik pö tegot.

Dido nek lüloganas äkanon tuvedön: lü kis caf zesüdon; ab alikan äsagon büocedis okik.

„Bo uts esludons ad kükön supi pro oks, dat ojanedons bü detäv“ - jicilil: ‚Kamisol=ül‘ < esagof.

„Si, dido!“ - Luskopülan egesagom - „bo, leigo öfidoföv boso if detävoföv lü täv solunik!“

„Lesi,“ - Kamisolül esiof. - „Ba, atos jenon lätikna...“

„Kis jenon lätikna?“

„Ba, etans ofidons lätikna, poso oflitons, bälun ukräkon ed udei=falons.“

„No dredälolös, no kräkon“ - Löpikan esagom ofe. - „Nedos seflitön löpio ad kräkön, ab, ekö!, ut blibon iso ya ünü vig lölik e fliton neseimio.“

„Ab nu ofliten!“ - Gnobül egesagof, kel kobü Musakül koo ilükömof ad logedön fliti.

Suno pos brefüp lülogans valik eprimons ad feitön vemo. If seiman äsagon, das bälun ofliten, tän sunädo votikan ägesagon, das no ofliten, e güo if seiman äsagon, das no ofliten, tän sunädo ägesagoy utane, das ofliten. Jov edavedon so vemik, das äkanoy lilön nosi. Hicilils tel efikomipoms ta od pö naf semik: sovemo atans äfeitoms. Töbido efideteiloy onis de od



me vat.

Ün tim et lut pevamükon pö caf ya saidiko, e Nolikan elonädöm, das ya nedos ad fulükön bäluni me lut hitik. Ab ad fulükön bäluni me lut hitik, balido nedos ad deflumön luti koldik se on. Nolikan elügolom lü bälun ed esäsnalom jainili, kel ätenidükön tenidiko rüdi gumik dono. Lut koldik ko c sijid laodik eprimon ad plödikön se bälun. Lövikans, kels äfeitons dö: bälun ofliten-li u no ofliten-li<, eflékons oki ed äloegons trakön vifiko bäluni. Ut emüdikon, efronikon äsvo bün sägik ed enepubon ad don bäseta. Pö spad, kö bälun gretik ädajonon oki büiko, nu bäset petegöl me flökot löpao te topon.

Sijid estopikon, e sunädo smil balälik esüikon. Valikans äsmilons: e utans, kels äsagons, das bälun ofliten, e utans, kels äsagons, das no ofliten; i flen Nenolikana: Flabül< äsmilom sovemo, das igo edofalom se naf ed ekodom böli len kapa>bäk. Sanan: Pilulülan< äsötom lekälön etani sunädo e smivön böli me tintur yodinik.

„Kio utans eflitons!“ - ävokädoys züo. - „Bälun Nolikana kion! Äjäfons me ut ünü veg lölik, ab ut ekräkon. Klaunö! Neai äsmilobs so mödiko pö lif!“

Ab Nolikan i atna no edemom lukofis. Eyümom cafi ko bälun me rüdil lunik ed ebüdom ad pömön luti me pömöm, kel äkoboton ko caf. Lut nulik eprimon ad nüdranön ini caf, e lut pevamüköl ämufon ve rüdil ebo ini bälun. Pianiko bälun dis flökot äcenon ad ai gretikum ed ya eprimon ad pubön dese bäset.

„Logedolsös“ - lülogans äyubons - „etans dönu svolükons oni! Bisarans kion! Ab ut dönu ukräkon.“

Nek äkredon, das bälun ofliten. Ab vüo ut äcenon ad nog gretikum, epubon dese bäset ed äseaton pö on äsvo



melun gretik su bovedil. Tāno valikans ekūpons, das bälun okao nevifiko elöpikon ed etenükon flökoti, me kel pätanon lü bäset. Valikans evokādons stuniko. Alikan älogon, das nu nek ätiron bäluni löpio me jain.

„Yö!“ - Kamisolül evokādof ed igo äplodof.

„No luvokādolöd!“ - Löpikan ezunetom ofi.

„Ab ga ut ofliton üfo!“

„Igo ut no fliton. Ekö!, pätanon lü bäset. Vo-li ut okanon tovön bäseti e ga ko löpikans zuo!“

Ab ottimo Löpikan eküpom, das bälun, ecenölo ad gretikum, etovon löpikumo e bäset detovon se glun. Löpikan no elaidälom ed evokādom töbidiküno:

„Stöpädolsöd oni! Ga udefliton! Kisi dunols?“

Ab bälun no ädefliton, bi bäset päfimatanon fimiko ko nötabimül. Bäset te elöpikon bosilo se glun.

„Yö!“ - ävokādons de flans valik. - „Yö! Süperö!, o Nolikan! Bälun Nolikanik kion! Me kis etans äfulükons oni? Bo, me stem.“

Nu valikans äkredons, das bälun ofliton.

Reidolsös fövoti konota pö nüm fovik.